

Politica na Aruba:

Stop di haci buya cu cabay bieu

ORANJESTAD(AAN)

Politica na Aruba a para bira un comedia cu por ser exporta pa cualkier pais cu ta pasa soapserie na canalnan di television pasobra riba e pida baranca chiquito aki hipocrecia ta floreciendo cu e rapidez di luz acompaña di actuaciónnan theatral cu te hasta na Hollywood nan lo por ta jaloers riba dje.

Cu e rapidez di rayonnan laser cierto politiconan ta lansa un mentira tras di otro pa asina engaña pueblo y nan ta haci tal pasobra cuero di cara a bira algo sumamente schaars na Aruba.

Cierto politiconan a perde tur nocion di kico ta respet y decencia pasobra den dia cla nan ta kere cu nan por tuma hende haci kens y na e mesun momento laga pueblo den un situacion di inestabilidad politico, basta nan si sigui keda ranca na e cabuya di poder.

E mesun cabuya di poder cu nan ta ranca na dje riba un dia

y tene cuidao cu esaki no ta pronto, nan lo colga nan mes.

Un partido ta bisa cu cos ta bon y otro ta bisa cu cos ta malo y un otro ta para wak den banda con dos cacho di caya ta para bringa cu otro den un bataya pa un weso bieu di un cabay cu a muri dia bieu.

Partido A ta bisa: "Tempo cu nos tabata den gobierno ta nos a bin cu autonomia pa Aruba", partido B cu no por keda sin reacciona pa sigui gaña pueblo den e mesun rosea pasobra y nan tambe mester bisa algo: "Tempo cu nos tabata den gobierno nos a rescata e isla di un desastre".

"Ta nos a bin cu turismo" y e otro ta gaba con nan tabata mas cerca di pueblo.

Un ta bisa cu e otro a plama informacionnan rond mundo pa asina perhudica hopi hende na Aruba y cu nan nunca lo haci algo pa perhudica Arubianonan manera cu e otro a haci, pero poco despues nan mes ta entrega yunan di tera cu e ley di extradicion discriminatorio.

Awor cu e situacion financiero na Aruba ta malo ta tur sorto di weso bieu ta ser saca

di e lachi di pasado pa asina camufla tur debacle cu a tuma lugar durante ultimo añanan.

Poniendo na prueba tur dia e inteligencia di pueblo, nan ta kere cu nan por sinta gaña hende den dia cla con bon nan tabata y con bon e situacion ta actualmente, siendo cu pueblo dia pa dia ta notando cu ta atras cos ta bay riba e isla aki.

Pueblo ta harta pa tende cu bisa welo o welo o tata di tal politico a yega di haci tal pa e pais y asina pa medio di un letania sin fin, partidonan politico ta sigui trata di tapa nan inferioridad y nan erornan.

Ultimo simannan cu a pasa pueblo mester a tende con cierto partido den pasado tabata haci atakenan baho contra otro politiconan di otro partido y con por ta posibel cu awor e situacion por presenta cu cierto politiconan por bay sinta cu otro den gobernacion.

Ta kico politiconan na Aruba ta kere?

Nan ta kere cu pueblo ta bobo y cu pueblo no ta wak e wega pa poder y e hamber pa poder di cierto politiconan cu cueste loke cueste kier bolbe riba e stoel dushi?

AVP awor ta cuestiona e posibilidad cu MEP por bay forma un zakenkabinet cu OLA pasobra MEP a lastra Lili y Glenbert den ultimo campananan cu a tuma lugar.

AVP si kier forma un gobierno politico cu MEP siendo cu AVP mes a lastra MEP sin fin y MEP di su banda tambe a aplica e mesun tactica cu AVP.

Pueblo ta conciente di esaki pero ta politiconan cu awor ta haci saltonan mortal, ta kere cu pueblo ta kens y cu hende a lubida.

Si ta asina cu esnan cu a intimida, persigui y lastra otro no por bay sinta goberna cu otro, anto pueblo por saca e conclusion rapido cu ni AVP, MEP y ni OLA por sinta cu otro pasobra ta tur a bringa otro durante ultimo eleccion y AVP cu MEP pa hopi tempo caba tabata bringa otro.

Algun siman pasa ainda AVP tabata lembe MEP di tur banda y tabata bisa cu mester lubida pasado y awor diripiente pueblo mester tende con malo MEP ta pasobra nan no kier forma gobierno cu AVP.

Esaki no ta hipocrecia y faltamento di respet pa e

pueblo votador, cu ta wak un informado cu ta cana pariba pabao y no por ni informa su mes corda haci algo cu por muestra den direccion di por logra forma un gobierno?

AVP su informado no a logra di forma un gobierno cu MEP y MEP na su turno a bisa bon cla cu ta un zakenkabinet nan kier wak y nada otro cu AVP pasobra nan no ta confia AVP y sigur no e politico Henny Eman.

Mas claro no canta un gallo!!

Kico ta keda na opicionnan habri?

Pueblo no kier un siguiente eleccion e aña aki mes y ta pesey cualkier mucha di school por compronde cu awor pueblo mester haya sa si MEP ta bay forma un gobierno cu OLA; sea zakenkabinet o algo otro.

Si tur partido ta bisa cu nan ta respecta reglanan di democracia anto ta di con awor no por duna espacio pa wak si MEP cu OLA por forma un gobierno cu otro?

Ta pakico awor diripiente OLA mester tene cuenta cu MEP a lastra OLA sin fin du-

Segui lesa pag. 60

Tele Aruba ta un canal hopi profesional

ORANJESTAD (AAN)

Tele-Aruba a bin ta mehora su programacionnan barbaramente, te e punto cu ta dificil pa e otronan alcanze o dune un competencia real. For di un posicion algun aña pasa di confianza, pasobra ta e so tabata existi na Aruba, bao e presion di competencia el a mehora, el progresa y el a profesionaliza su mes hopi.

Su programanan di noticia ta esnan nan mira; su telenovelan ta di e agrado di e teledivertenan; su programacionnan musical, carnavalesco y di interes general no tin comparacion. Por ehemplo, e colornan di Tele-Aruba durante e parada di carnaval di mucha na Playa tabata sublime. Mucho miho cu cualke un di e otronan.

Pueblo ta sintie orguyoso di su canal di television. Bao e direccion energico y hopi competente di Demetrio Maduro, el a alcanza awendia e posicion mas halto den e ratingnan reciente cu DIARIO a mira. Pabien, Demetrio! Pabien, henter e personal di Tele-Aruba. Sigui asina.

JUSTICIA TA LABORA PA....!!

